

Служба святому блаженному Иоанну Босому, Киевскому Христа ради юродивому

НА ВЕЛИЦЕЙ ВЕЧЕРНЕ

На «Господи воззвах» стихиры, глас 4:

Приидите, людие, ублажим избранника Божия, святого Иоанна Босого, в последняя лета подвигом добрым подвизавшагося. Ныне бо сей Престолу Пресвятыя Троицы предстоит, даровати мир душам нашим молится, и земли Киевстей велию милость.

Приидите, вернии, восхвалим нищих питателя, нестяжателя нелицемернаго, Иоанна блаженного, иже молится Дароподателю Христу миром землю Киевскую оградити и душам нашим подати велию милость.

Приидите, вернии, похвалы и песни достойныя святому Иоанну Босому принесем, днесь бо священное торжество, Небеса со ангелы радуются, и нас воспевати подвизают: услыши прошения наша, угодниче Христов всеблаженне, земли Киевстей мир даруй, и душам нашим велию милость.

О, блаженне отче Иоанне, имея душу милостиву, чист помысл и сердце бодро, веру неблазненну и любовь нелицемерну, милосердия делами богат сый, от земли преставился еси к Небесным и с лики праведных водворяешися. Темже ты песньми священными почитаем, досточудне.

О блаженне отче Иоанне, ты ходатая и молитвенника благоприятна имама к Богу, ты бо молиши за вся православныя люди, яко да избавимся от бед и скорбей и от всякаго навета вражия. Темже прославляем память твою святую и восхваляем тя, зовуще: не престай молитися о душах наших.

О блаженне Иоанне богомудре, чистое сердце твое, правоверным смыслом сияюще, озаряет верных добродетелей светлостью, демонскую тьму отгоняюще. Темже ты, яко причастника невечерняя благодати, вернии воспевают, достославне.

Слава, глас 6-й:

Воздержания учителю, милосердия рачителю, храмов Божиих попечителю, прелогов вражиих победителю, память твою торжествуем светло, просяще предстательства твоего, отче Иоанне богоблаженне.

И ныне, глас тойже, Богородичен догматик: Кто Тебе не ублажит...

Вход. Прокимен дня. Паремии.

Премудрости Соломони чтение (глава 3):

Праведных души в руце Божией, и не прикоснется их мука; непщевани быша во очесех безумных умрети, и вменися озлобление исход их, и еже от нас шествие - сокрушение; они же суть в мире. Ибо пред лицом человеческим аще и муку приимут, упование их безсмертия исполнено; и, в мале наказани бывше, великими благодетельствовани будут: яко Бог искуси я, и обрете их достойны Себе. Яко злато в горниле искуси их, и яко всеплодие жертвенное прият я. И во время посещения их возсияют, и яко искры по стеблию потекут. Судят языком и обладают людьми, и воцарится Господь в них во веки. Надеющиеся Нань разумеют истину, и вернии в любви пребудут Ему; яко благодать и милость в преподобных Его, и посещение во избранных Его.

Премудрости Соломоновы чтение (глава 4):

Праведник, аще постигнет скончаться, в покой будет. Старость бо честна не многолетна, ниже в числе лет исчитается. Седина же есть мудрость человеком, и возраст старости, житие нескверное. Благоугоден Богови быв, возлюблен бысть, и живой посреде грешник, преставлен бысть. Восхищен бысть, да не злоба изменит разума его, или лесь прельстит душу его. Рачение злобы помрачает добрая, и парение похоти пременяет ум незлобив. Скончався в мале, исполни лета долга. Угодна бо бе Господеви душа его. Сего ради потщася от среды лукавствия. Людие же видевшие и не разумевшие, ниже положше в помышлении таковое: яко благодать и милость в преподобных Его, и посещение во избранных Его.

Премудрости Соломони чтение (главы 5 и 6):

Праведницы во веки живут, о Господе мзда их, и попечение их у Вышняго: сего ради примут царствие благолепия и венец доброты от руки Господни, зане десницею покрывает я и мышцею защитит их. Приимет всеоружие - рвение Свое, и вооружит тварь в месть врагом. Облечется в броня правды и возложит шлем - суд нелицемерен. Приимет щит непобедимый - преподобие. Поострит же напрасный гнев во оружие; споборет же с Ним мир на безумных. Пойдут праволучныя стрелы молниины, и, яко от благокругла лука облаков, на намерение полетят. И от каменометных ярости исполнь падут грады; вознегодует на них вода морская, реки же потопят я нагло. Сопротив станет им дух силы, и, яко вихор, развеет их, и опустошит всю землю беззаконие, и злодейство превратит престолы сильных.

Слышите убо, царие, и разумейте; навькните, судии концов земли. Внушите, держащии множества и гордящиися от народов языков: яко дана от Господа держава вам, и сила от Вышняго.

НА ЛИТИИ СТИХИРЫ, глас 5:

Путем юродства Христа ради шествовал еси, блаженне Иоанне Босый, делом твоим явил еси, како в широту райскую добре ходящии во Христе вводими бывают. Темже путем, блаженне, приведи ко Христу и вся верные.

СЛАВА: глас тойже.

Радуются вси людие вернии, и земля Киевская ликует, празднующе память блаженного Иоанна: его бо житием дивным украсися чудно Церковь наша, юже Господь таковым крином украси. Того молитвами подаждь, Господи, милость Твою ко спасению душ наших.

И НЫНЕ: глас тойже.

Радуйся, благословенная Владычице, Бога плотию неизреченно Рождшая, за нас на кресте смерть Приявшаго. Того моли, Всеблаженная, да Твоими молитвами спасет души наша.

НА СТИХОВНЕ СТИХИРЫ, глас 4.

Дал еси дивное утверждение граду Киеву, Господи, чудного смиренника блаженного Иоанна, неистощимое сокровище преизобильное самоотвержением многим, крепка поборника на гордыню и в бедах заступника: его же молитвами спаси град сей и страну нашу, Иисусе милосерде, и Спасе душ наших.

Стих: Дивен Бог во святых Своих, Бог Израилев.

Дал еси украшение, Господи, обители Десятинней, блаженного Иоанна Босого, содейственника бывающа чудесем многим, град от запаления огненного избавляюща, милосердия изрядно сотворяюща и молящася Тебе, Иисусу милосердному и Спасителю душ наших.

Стих: Святым, иже суть на земли Его, удиви Господь вся хотения Своя в них.

Дал еси новое знамение верующим в Тя, Господи, истиннаго Твоего угодника: вернии бо приемлют утешение скорбным сердцам, притекающе к нему. Темже убо и мы, днесь сошедшеся, память блаженного Иоанна празднующе, верно Ти, Господи, вопием: того молитвами спаси нас, Иисусе милосерде, и Спас душ наших.

СЛАВА: глас тойже.

Что тя наречем, блаженне Иоанне: земнаго ангела и небеснаго человека, яко в мире сущая ни во что вменил еси; учителя смирения, яко вся в житии терпел еси радостно; пророка и провидца: будущая бо провидел еси яко настоящая, и в тайне содеянное безтрепетно обличал еси. И ныне молися Христу Богу, умирить мир и утвердить Церковь святую.

И НЫНЕ: глас тойже.

Храм и Дверь еси, Палато и Престол Царев, Дево всечестная, ею же Избавитель наш, Христос Господь, во тли спящим явися. Солнце сый правды, просветити хотя вся яже созда по образу рукою Своею. Темже, Всепетая, матернее дерзновение к Нему стяжавшая, непрестанно молися спасти души наша.

Тропарь, глас 1:

Яко бисер безценный явился еси на горах Киевских, блаженне отче Иоанне, нестяжанием и нищелюбием Бога прославив, и дар любви нелицемерныя взыскав. Темже по смерти благодать исцелений приял еси. Моли Христа Бога спастися душам нашим.

НА УТРЕНИ

По 1-й стихологии седален, глас 1.

Странноприимчество и милосердия истовое служение, яко фимиам приятный, Богови принесл еси, блаженне отче Иоанне. Темже преблагий и великий Дарователь Христос прият тя в Небесныя обители, сего ради память твою с верою почитаем, досточудне.

Слава и ныне, Богородичен, глас 1-й:

О Твоем, Владычице, явлении преславном умильни бывше людие, вкупе же и радостни, яко чудес сокровище, пречистый Твой образ лобызают, Божиею благодатию просвещающ верныя и от бед избавляющ с любовью притекающия.

По 2-й стихологии седален, глас 2-й:

Суетную прелесть мира отвергл еси, истинному Свету и заповедем евангельским последовал еси, милосердием душу свою украсил еси и юродством Христа ради Ему искренне послужил еси. Сего ради зовем ти: радуйся, блаженне отче Иоанне.

Слава и ныне, Богородичен, глас 2-й:

О, Всепетая Мати! умилосердися на моление наше: Сына бо Твоего и Твое есмы достояние, вся спаси и помилуй, да вси Тя непрестанно во образе Десятиннем величаем.

По полиелее седален, глас 4:

Образ благочестия и нищелюбия явився, богатая духовная дарования обрел еси у Христа, Иже и прослави тя, Иоанне блаженне, славою неувядаемою, и даром исцелений и чудес обогати, Емуже молися о спасении душ наших.

Слава, иныне, Богородичен:

Богородице Дево, Вседержавная наша Царице, омофором молитв Твоих покрывающая весь мир, прими от благодарных сердец наших похвальныя песни сия и испроси нам у Сына Твоего Богоначальнаго грехов прощение и велию милость.

Таже степенна, й-1 антифон, глас 4. Прокимен, глас 4:

Честна пред Господем смерть преподобных Его.

Стих: Что воздам Господеви о всех, яже воздаде ми?

Всякое дыхание...

Евангелие от Матфея, зачало 43.

По 50-м псалме стихира самогласна, глас 6:

Крест Христов на рамена своя приял еси, сораспялся любовию миру, и, последовавши заповедаем Спаса Христа, суемудрие житейское и всякое пристрастие отвергши, дивным житием просиял еси, и восприял еси вечное блаженство. И днесь Господеви предстоя, помяни всех присно чтущих тя, Иоанне достоблаженне .

КАНОН

СВЯТОМУ БЛАЖЕННОМУ ИОАННУ БОСОМУ

ГЛАС 8.

Краегранесие: СЛАВЛЮ ИОАННА БОСОГО И ЖИТИЕ ЕГО ДИВНО

Песнь 1.

Ирмос: Воду прошед яко сушу, и египетскаго зла избежав, израильтянин вопияше: избавителю и Богу нашему поим.

Припев: Святой блаженный отче Иоанне, моли Бога о нас.

Сподоби нас, Господи, песнь воспети блаженному Иоанну Босому и восхвалити достойно сего странника земнаго и к небесем пресельника.

Лоза благоуханная винограда Христова явился еси, Иоанне богоблаженне, процвел бо еси духом в земли Киевстей,

Божественною сладостию напитавыйся, плоды красныя произрастил еси. Темже славим тя яко странника земнаго и к небесем пресельника.

Алчущих питателю, церкви Десятинныя славное украшение, в ризу юродства во Христе оболчен еси, босыми ногами по земли ходивый, видимо высший смысл показуя, блаженне Иоанне: несмысленная обличая, приводя верных к покаянию. Темже поем тя ныне яко странника земнаго и к небесем пресельника.

Богородичен: Всепетая Мати, Богородице Дево Преславная, помощь всем погибающим в пучине греховней, простри над нами покров

милости Твоея молитвами Иоанна блаженного странника земнаго и к небесем пресельника.

Песнь 3.

Ирмос: Небеснаго круга Верхотворче, Господи, и Церкви Зиждителю, Ты мене утверди в любви Твоей, желаний краю, верных утверждение, едине Человеколюбче.

Любовию ко Христу уязвляем, о всех благах на земли не радев, себе отвергшися и во плоти, яко ангел, явися, страсти умертвил еси, Иоанне преблаженне. Ныне же страсти омраченных душ наших утоли молитвами твоими.

Юже стяжал еси житии своем, душевную чистоту, без неяже никто не узрит Господа, блаженне отче Иоанне, испроси нам у Дароподателя Христа и страсти омраченных душ наших утоли молитвами твоими.

Иоанне досточудне, босым святыни града Киева обходяй, не имея, где главу подклонити, от храма Божия никогдаже отлучаяйся, не остави нас тощими благодати, но страсти омраченных душ наших утоли молитвами твоими.

Богородичен: О, Пречистая Дево Богородице, Милости и любви Источнице, молим тя: молитвами Твоими мир сохрани и спаси люди отчаянные, страсти омраченных душ наших утоляющи.

Седален, глас 4:

Бездомных собирал еси под кров твой, Иоанне богоблаженне, алчущих питал еси, немощным служил еси в болезнях, всех же на путь спасения наставлял еси. Темже ныне Чертог преукрашенный Спасов наследовал еси, святе.

Слава, и ныне, Богородичен, глас 4:

Надежду имуще на Тя, Богородительнице Дево Неискусобрачная, верных добрую Хранительницу и алчущих Преблагую Питательницу. Темже молим Тя, храни люди Тя величающия.

Песнь 4.

Ирмос: Услышах, Господи, смотрения Твоего таинство, разумех дела Твоя и прославих Твое Божество.

Ангеле земный, Иоанне досточудне, Киевская земля днесь веселия исполняется, память твою светло совершающе и непрестанно

Христу воспевающе: слава силе Твоей, Господи.

На церковней тверди, яко звезда пресветлая, просиял еси, Иоанне отче всеблаженне, осияй нас чад твоих, всечестную твою память празднующих и поющих Спасителю Богу: слава силе Твоей, Господи.

Над горами Киевскими светом святым возсиял еси, яко светильник многосветлый, мрак грехов разгоняющий, милосердне Иоанне Босый, и пети Христу Богу научающий: слава силе Твоей, Господи.

Богородичен: Ангелов по благодати превосходящую Приснодеву и Богородицу пред образом Ея дивным, иже во обители Десятинной прославися, воспеваем, поюще нетленно из Нея Рождшемуся: слава силе Твоей, Господи.

Песнь 5.

Ирмос: Просвети нас повелении Твоими, Господи, и мышцею Твоею высокою Твой мир подаждь нам, Человеколюбче.

Босым святыни града Киева обходяй, не имея, где главу подклонити, смирением божественным украсился еси, Иоанне достославне, и нам память твою творящим добродетелию сею и терпением украситися Христа Бога умоли.

Обул еси нозе твои во уготование благовествования мира, егда благочестивец некий даде тебе обиталище, идеже ты не токмо сам вселился еси, но и нищим послужити сугубо потщался еси. Темже просим тя, Иоанне досточудне, нищелюбию научи нас, да служити усердно ближним сподобимся. О сем Христа Бога умоли.

С праведными веселишися, преблаженне Иоанне, с нимиже Господеви предстоя во обителях Небесного Царства, мир мирови даровати и всем христианом здравие и скорбящим утешение Христа умоли.

Богородичен: О, Превысшая Херувим, родила еси Исполнение Закона и пророков,

Божия Слова воплощена, Сына Единородна, Егоже о рабех Твоих умоли.

Песнь 6.

Ирмос: Молитву пролию ко Господу, и Тому возведу печали моя, яко зол душа моя исполнися, и живот мой аду приближися, и молюся яко Иона: от тли, Боже, возведи мя.

Господа всем сердцем возлюбил еси, разум богопросвещенный стяжавше, и о исполнении воли Божией возревновал еси, егда дела милосердия вершил еси в житии твоём преславнем и егда подвиг юродства Христа ради подъял еси, ныне же душа твоя во благих водворяется, приял бо еси от Христа венец нетленный.

О бездомных попечение имуще, странноприимницу сотворил еси при храме святого апостола Андрея, рабов Божиих усерднейший служителю, Иоанне блаженне, ныне же душа твоя во благих водворяется, приял бо еси от Христа венец нетленный.

Иоанне дивне, не себе угождал еси, обаче ближним служил еси в нуждах телесных и духовных. Тако и боголюбца Дамиана добродетелям научивый, иже в монашестве Вонифатием наречен быв, пастыря доброго инокам воспитавый. Ныне же душа твоя во благих водворяется, приял бо еси от Христа Бога венец нетленный.

Богородичен: Жизни Подательнице, верою славящая Тя и от души поющая блаженного Иоанна Босого радости неизреченная исполни, и Света невечерняго сподоби, Благодатная, Дево и Богородице Преславная.

Кондак, глас 8:

Суетная мира презрев, Христа ради юродство избрал еси, блаженне, присно в подвизех пребывая и нищим питатель быв. Темже дары Духа Святого приял еси обильно, отче наш Иоанне, молитвенниче неусыпный о всех верою почитающих тя.

Икос

Ангельски на земли поживый, и в славе Небесней ныне пребываяй, блаженне Иоанне, никакоже оставляеши нас, чад твоих, обаче предстательствуеши о нас, молитвами твоими от бед покрывающе, и ко спасению наставляеши, поющих ти сице: Радуйся, яко земная отринул еси; радуйся, яко Небесная восприял еси. Радуйся, земный Ангеле; радуйся, человеке Небесный. Радуйся, временная преобидевый; радуйся, вечная возлюбивый. Радуйся, Лице Божие присно зрящий; радуйся, чад твоих на земли николиже оставляющий. Радуйся, Иоанне, подвижниче Христов предивный.

Песнь 7.

Ирмос: От Иудеи дошедше отроцы, в Вавилоне иногда, верою Троическою пламень пещный попраша, поюще: отцев Боже, благословен еси.

Искушения от мира, плоти и диавола находящия низложивше, востекл еси в чертоги Отца нашего Небеснаго, богоблаженне Иоанне, идеже предстательствуеши о нас, заступления Твоего просящих, и подвизаеши купно с Тобою взывати: благословен еси, Боже отец наших.

Таин Христовых приобщился еси благоговейно, Иоанне всеблаженне, и, егда дух твой Богу отдал еси, мраз лютый во граде Киеве абие на благоведрие пременися. Людие же боголюбивыя знамение сие о праведней кончине твоей зряще, воспеваху: благословен еси, Боже отец наших.

Иоанне праведниче достославне, кадилу, елею и миру благоуханному молитвы твоя подобны, восходят бо сия ко Престолу Вседержителя Бога и милость Его преклоняют к нам, сердца же наша умягчают и врачуют и подвизают взывати: благословен еси, Боже отец наших.

Богородичен: Едина Всепетая, Богородице Дево Преславная, милостию Твоею весь мир обогащаеши и души просвещаеши, темже воспеваем Ти: Христа Бога нашего Мати, благословенна еси.

Песнь 8.

Ирмос: Царя Небеснаго, Егоже поют вои ангельстии, хвалите и превозносите во вся веки.

Евангельским словесем внемлюще, крест свой на рамена восприял еси и Христу последовал еси, блаженне отче Иоанне, Аврааму страннлюбием подражал еси, непрестанно Господу взывающе: превозносимый отцев Боже, благословен еси.

Господь от лика праведных и по смерти твоей не отлучи тя, Иоанне страннлюбче, милосердием и любовью ко ближним помилование от Бога получил еси, чистотою и целомудрием Бога зрети сподобился еси, Емуже ныне со всеми святыми поеши: превозносимый отцев Боже, благословен еси.

Троичен: Отче Вседержителю, и Слове, и Душе, трети соединяемое во Ипостасех Естество, Пресущественне и Пребожественне, Тя воспеваем: превозносимый отцев Боже, благословен еси.

Богородичен: Дерзновение имущи ко Господу, яко Мати Его Безневестная, заступи и сохрани нас Твоим ходатайством, Богородице, яко да воспеваем: превозносимый отцев Боже, благословен еси.

Песнь 9.

Ирмос: Воистинну Богородицу Тя исповедуем, спасеннии Тобою, Дево чистая, с безплотными лики Тя величающе.

Иоанне старче дивне, добродетельми преукрашенный и благодатию Божественною освященный, предстоиши во славе Небесней и молишися за ны, подаеши нам путей спасительных разумение, и недужныя силою Христовою исцеляеши, не остави песньми тя ныне величающих.

Всем с верою к тебе притекающим, исцеления подаеши, Иоанне богоблаженне, темже ныне молим тя мы, грешнии: печаль нашу на радость преложи и от всякия напасти и скорби святыми твоими молитвами нас избави песньми тя ныне величающих.

Не престай приносить иоления о нас ко Владыце Христу, святой Иоанне, яко сосуд благодати Божия избранный, вспомоществуя верным в подвизе спасения, песньми тя величающих.

Богородичен: О, Пренепорочная Дево, Ты еси праведников доброто, Ты еси верных надеждо, Ты еси соблюдение наше, Ты еси мост, к жизни нестареющей приводяй всех верою и любовью Тя, Богородице, величающих.

Светилен, глас 8:

Якоже солнце светоносно возсия ныне, блаженная отче Иоанне, память твоя, вся верныя веселяще, иже радостно взывают ти: молися прилежно спастися нам.

Слава, ин светилен, глас 8:

Велиим подвигом жития твоего, Иоанне блаженне, смирением и самоотвержением, яко крилома, высоты блаженства достигл еси и непорочного жития ради почесть от Бога приял еси. Темже молим тя,

святе, пребываяй во свете Христовом, поминай нас, верую чтущих святую память твою.

И ныне. Богородичен, глас тойже:

Света Непреступного еси источник, Богородице Всесвятая, просвещаеши убо тьму греховную и отгоняеши душ и телес лютыя, осенением Твоим единым токмо, свет спасения изливающи.

НА ХВАЛИТЕХ СТИХИРЫ, глас 4.

Днесь притецем вернии, да радостно торжествуем: се бо процвете благочестия крин и о согражданах теплый молитвенник, града Киева чудная похвала и заступление новый угодник Господень. К нему же возопиим: блаженне Иоанне, моли Христа Бога о чтущих святую память твою.

Блаженне Иоанне, бездомных и нищих покровителю, немощных служителю, алчущих питателю, истинныя любви к ближнему учителю! Славим дела твоя, яже к Богу и ближним, почитаем странное твое пребывание, подвижнице Христов достохвальне.

Житием и чудесами просиял еси миру, Иоанне богоблаженне, к Свету невечернему прешел еси, радуяся. Темже твое светоносное торжество совершаем, благочестием твоим осияеми.

Благочестия истиннаго рачителю, милосердия преславный учителю, странноприимницы добрый зиждителю, блаженне отче Иоанне, венец словесный ти исплетаем, любовию чтуще тя, делателю Христов неустанный. Ты же молися ко Господу спастися душам нашим.

СЛАВА, глас 6.

Новое и дивное Церкви украшение, на горах Киевских светильник многосветлый, преизрядный и дивный угодниче Христов, блаженне отче Иоанне, моли милостиваго Бога, да прегрешений оставление подаст душам нашим.

И НЫНЕ, Богородичен, глас тойже.

Богородице, ты еси лоза истинная, возрадившая нам плод живота: молимся Ти, Владычице, со блаженным Иоанном, помиловати души наша.

Славословие великое и отпуст.

НА ЛИТУРГИИ

Блаженны от канона песнь 3-я и 6-я.

Прокимен, глас 7:

Честна пред Господем / смерть преподобных Его.

Стих: Что воздам Господеви о всех, яже воздаде ми?

Апостол к Галатам, зачало 213.

Аллилуиа, глас 4: Праведник, яко финикс, процветет, / яко кедр, иже в Ливане, умножится.

Стих: Насажденнии в дому Господни во дворех Бога нашего процветут.

Евангелие от Луки, зачало 24.

Причастен: В память вечную будет праведник:

МОЛИТВА ИОАННУ БОСОМУ

О блаженне отче Иоанне, верный рабе Христа Бога и всем страждущим скорый помощниче! Ты небеснаго отечества взыскуя, дом и вся сродники

твоя оставил еси, хлад и зной претерпевая, плоть свою постом и нищетою смиряя, дар любви и прозорливости стяжал еси. Услыши нас, многогрешных, ныне к тебе вопиющих, и молитвами твоими исцели всяк недуг душ и телес наших, защити нас от враг видимых и невидимых, сподоби нас течение жизни сея непреткновенно прейти, христианскую непостыдную кончину нам у Господа испроси и Небесное Царствие унаследовати сподоби. Молим тя, отче блаженне, обрати сердца наша к любви нелицемерней и истинному благотворению, помози воздвигнути святые храмы в душах наших и добродетельми их украсить, наипаче молим тя, испроси у Господа паки сияти (детищу святого равноапостольного князя Владимира) храму Десятинному в честь Пресвятой Владычицы нашей Богородицы и Приснодевы Марии, идеже ты во дни жития своего молился еси, да купно с тобою прославим Святую Троицу, Отца и Сына и Святаго Духа во веки веков. Аминь.